

一週內。我擇一日。補行休沐可乎。張督曰。如命。三月二十九日。爲星期三。余適補假。免受兵火虛驚。只在家遙望節轅。憂惶不寐而已。督署餘燼未收。附近匪徒。闖入搶掠。事後張督。檄提藩庫五萬金。爲彌補署中損失之用。屬自估報。因以爲利者。類多無而爲有。虛而爲盈。噲等實羞爲伍。一日庶務委員。持簿請書。余援筆書曰。劉乃勛並無損失。張督閱之。憮然曰。我知此公。被褥衣裳。被掠淨盡。書箱撞破。損失不資。願乃矯枉過正。將若之何。越數日。田委員承斌來宅。傳張督語。由去年十二月到館之日起。原係月脩一百兩。改爲二百兩致送。並補送四月餘脩銀前來。余只得照領。張督暫在水師公所辦公三日。卽移駐德宣街督練公所。爲兩廣總督行署云。

論曰。黃興焚攻督署一事。諸家紀載。言人人殊。要多不實不盡。余矯其失。耗費數日心力。作得此篇。悉取材於年記。年記所不及載。悉心追憶以足之。然張巡捕猶失其名。於以知左傳史記之長篇大論。未盡可憑。昔賢早窺其隱矣。篇中除黃興主張急進。兼欲效曹沫所爲。係據革黨口供外。餘俱親見親聞。篇末補行休沐。不屑報失兩節。係余個人瑣事。連類書之。以見事皆目覩躬親。與道聽塗說者迥殊也。

宣統三年三月二十九日黃興焚攻兩廣督署紀實

劉乃勛

宣統三年二月。溫生財在廣東省城東較場。省諮議局前。槍殺鎮粵將軍孚琦後。風鶴頻驚。三月中。革命黨黃興趙聲等。運入軍械甚多。圖謀起事。兩廣總督張鳴岐。廣東水師提督李準。皆有所聞。檄調胡令宣。吳宗禹所部各營。回省防衛。趙聲知事機已洩。意欲中止。黃興憤激。力主冒險從事。遂於二十九日下午五時。集合同志近二百人。由小東營街。臂纏白布。整隊出發。撲攻督署。督署東西轅門。駐有兵士兩連。時值晚餐。突被襲擊。管帶金振邦。及各兵士。措手不及。棄箸紛逃。其持槍值守。排長一名。兵士八名。皆爲革黨手榴彈炸斃。有張姓文巡捕。偶忘其名者。在內聞變。立將宅門關閉。宅門居大堂二堂之交。門兩大扇。木製。外包薄洋錫。漆黑色像鐵。實則並不堅實。革黨槍攻宅門。洞百十孔未破。遂向大堂暖閣縱火。並持重物。撞開宅門。一擁而入。內無一兵應敵。革黨直入二堂。三堂。上房。徧覓張督不獲。封翁張步堂。及張督一妻一妾。瑟縮房隅。革黨謂之曰。不干汝等之事。不必害怕。旋至他處。分投搜索。署中員役。均無傷害。當張巡捕關閉宅門之後。覓見張督。引至圖籍所。屬兩繕校生。導之登樓。轉上瓦面。落厚祥街民居。送至天平街。水師公所。李水提處。張巡捕。卽與圖籍所長。分持電話機。通電李水提。及鎮統龍濟光。協統蔣尊簋。派兵赴援。李水提所派胡令宣。吳宗禹兩軍先到。將機關槍。架設東西轅門。革黨突圍衝出。中槍倒斃者。二三十人。餘衆退回。升屋跳遁。登時捕獲十餘人。翌日捕獲七八十人。張督因革黨。對其老父。及妻若妾。暨各員役均不加害。擬從寬釋。緣李水提意見參商。概行發交廣東緝捕總局。檄飭胡道銘榮。赴局幫同訊供。列摺稟辦。所捕革黨。經胡吳兩軍。訊有初供者。多所平反。翦髮學生。寃被捕擊者。悉皆保釋。綜計革黨攻入。用手榴彈。傷斃排長兵士共九人。革黨退出。被機關槍。擊斃二三十人。並無劇戰。管帶金振邦失蹤。或言戰死。或言畏罪潛逃。後亦竟無下落。竊維黃興此舉。糾合革黨。不滿二百人。別無援應。是爲硬幹。事安有濟。其意殆學曹沫。期得張督而劫持之。惟李水提。龍鎮統。蔣協統。各握重兵。此外尙有四營將官。張督雖兼署鎮粵將軍。但有左右都統。所轄八旗官兵。傳言喪君有君。斷不因張督身被劫持。遂至蛇無頭而不行。及各存投鼠之忌。則事又安有濟。第失敗爲成功之母。東隅雖逝。後來人當爲補於桑榆。曾不數月。義旗起於武昌。鄂督署一度圍攻。而瑞澂遽遁。廣東旋亦光復。此次革黨。勇於冒險。一往無前。固足令人驚服。其不嗜殺人。尤足令人佩服也。余辦督署總文案。寓宅在小東門外仁秀里。距署殊遠。而又不可徒行。雇用長班轎夫三名。月須工銀三十六兩。余圖節省。恆在署內下榻。前任總督袁樹勛。定有星期放假。文案諸君。援以爲請。張督未允。央余緩頰。張督曰。遇來復日。諸子盍簪朋游。我獨衙齋坐嘯。其何以堪。余曰。星期我不出署。可待清談。張督曰。先生屈己伸人。更不公允。余曰。